

## YUDA Ovoli Kĩ Yuda Tsɛɛ

<sup>I</sup> Ovoli kī to yī, Yuda, Yesu Kristo ɔsumunɛ a kī ĩnye Yakobo ɔwaɛ a sɛkɛ. Ntsɛɛ ye mamɛna bati a kī Baguma vɛ, kī Baguma boe ɔɛga awɛ be kalɛ, ade yadāɛna be akū kayi Yesu Kristo a. <sup>II</sup> Baguma kɔnyakamɔ, ye lukudɔ mɔ ye ɔdɔ ɛpɔ nɛ mi akū ebu.

### *Lubo a Kī Fɔvā Fɔtsa Batsanɛ Aayamɔ.*

<sup>III</sup> Yī bakɔba kī maátunɔ kalɛ, titɔ kī mbɔa mbɔdi kī matsɛɛ mi ovoli nɛ ayekī Baguma kpa boe flee nkpā a akū malo ni, finyaa fɔyasī mɔ ɔsī kī ntsɛɛ mi ovoli moatse nkɔa ndo mi kɔbɛ mipuli mipili katekado osi a. Ade katekado kī Baguma kɔa ɛkpa ye bati a deedimɔape a. <sup>IV</sup> Kitonɛkī bati kī baávila Baguma badi bɛla pɛtɛɛ biwo nɛ mi kamɛ nɛ mi katanyi kamɛ. Bɛdani boe ɔledo a kī bɔtɛ nɛ ayekī Baguma amɔ oti kɔnya akū a, batsa fɔtsa bɛbā kī fɔkpa be osi bɛbɔa ɔbla kpa. Bisī boe ɛgānokɔɛ mɔape kī ɛnye boe ɔlate Yesu Kristo. Katsɛɛ Kpalewa a ɛ eyi anɛ titiiti kī Baguma aakɔ be kɔtɔ lomɔ.

<sup>V</sup> Titɔ kī minyina fukī flee kɔkɔɛ malo ni, mawɛ kī makai mi kī boe ɔlate a nye Israelfɔ etomena Egiptefɔ tite akū, ɛmɛ ke liti a, ɛwɔla bikī betáte ye bido a. <sup>VI</sup> Mite anɛ kī Baguma ode fɔtɔ banyanɛ a kī betákɛna nɛ otumi a kī bɛkpa be a akū kakɛna wī, mbom bɛdzakū nɛ be mɔawɛ fudzikɔ a, Baguma do be nɛ nkɔsonkɔsɔ

kame daa ne otũ kpili kame, kĩ bena ne awã kenaawo Luwi Kpale a kĩ yaadzemo be ekõ be koto. **VII** Ade ayea Sodom mo Gomora mo temato a kĩ tifuã te a, bati kãa be akũ bekpa adõpaa mo obla kpa mo osĩ mo osĩ a. Baguma kãa be edo ne fi kĩ foádĩ da kame kĩ fonya nfantuhũ fõkpa bati flee.

**VIII** Ade ayea fõda bawane kĩĩ akena tokpa ne be moawe sukena akũ malo a. Baábu Baguma otumi a kĩ yanya be akũ a, ade bale tuwuli kpa ne ode fõtsa a kĩ obu deĩ ne foe akũ a akũ. **IX** Baguma Ode Fõto Onyanenokõ Flee Mikael malo tãkena fukĩĩ odu. Kĩ ye mo Abonsam bevele foletsa ne be kame oti a kĩ ye aabõe Mose onokpa akũ malo ni, etádo owõle ele tuwuli kpa ekõ Abonsam koto, mbom ele kĩ, “Olate a ekã no ane.” **X** Leme bati kĩĩ ale fuvũnatsa ne letsa nye letsa kĩ betãnu de kayõ a akũ, ade fõtsa a kĩ binyina bitomena be kabõa kame nde ayekĩ tuwĩ kame bayae kĩ belã adzuni a malo nyina a, ade foe moape a awõla be a.

**XI** Bõbõe makpa be! Betsã osi a kĩ Kain tsã a. Ne sika a kĩ baana sũ ni, bekõa be akũ bido ne tokpa a kĩ Balam kena a kame. Biyidza bedza ne Baguma mbla a akũ nde Kora aye, ade ke bewõla be nde ye aye a.

**XII** Nte mikpõta mianya boe Olate odo funitsã a, bati kĩĩ nye efĩ ne mi kame, awã kĩ baányõã kanya mo kamõa kpafũũ ne Baguma ane. Be odi akũ badãmena. Bela nde luflututu kĩ oni lelãa de kame, kĩ owõ abõa de katẽmena. Bela nde futse kĩ foáwũ babi ne kawũ loko, nde futse kĩ bebõle mo tunu fuku, fuku fubuli. **XIII** Bela nde mpo mui

kĩ ɔwe mɔ ɔsĩ abɔa be bafũ kanye be fɔnyɔãtsa katsa nde mui ane kuvũ aye. Bela nde fusibiiĩ kĩ fɔato katẽ, bati kĩ Baguma mane kadzikɔ̃ ekpa be ne ɔtũ kpili kame, awã kĩ baana daa.

<sup>XIV</sup> Ade bati kĩĩ akũ Henokĩ kĩ enye Adam kasinu kavũkɔnɔde a oti le eyi kɔkɔkɔe kĩ, “ɔlate a mɔ ye ode fɔto banyane kpalewa mpim mpim aya, <sup>XV</sup> eyaadzemo katinya kame bati flee. Yaako bati a kĩ baávila Baguma a kɔto ne fɔtsa kpa a kĩ bekena, mɔ tuwuli kpa a kĩ bele ne ye akũ a sũ.” <sup>XVI</sup> Bati kĩĩ akena hũhũhũhũ daa, kanye nfumusukakpa bati bebã. Batomena be mɔawe fɔwetsa kpa liti, bapia akũ, ade bake bati mɔ seme menemene ayekĩ baana letsa a kĩ de bawe a.

### *Osi Kasua Mɔ Kɔde Kakpa.*

<sup>XVII</sup> Leme mi yĩ bakɔba, mite ane ne boe ɔlate Yesu Kristo fɔto banyane fɔletsa a kĩ bele biyi ne lɔko a kĩ leyatẽ kame a akũ. <sup>XVIII</sup> Bibi mi kĩ, “Ne fuwi nkae a kame ni, bati aane, bidi mi nsekuo, bitomena be sukena fɔwetsa kĩ fɔako odo liti ne Baguma katavila kame.” <sup>XIX</sup> Ade be nye bati kĩ basẽ bati kame a, bati kĩ katinya kame fɔwetsa nya be akũ, mɔ bati kĩ Hũhũ a lelãa be kame.

<sup>XX</sup> Leme mi yĩ bakɔba, mi kɔ ni, mikaabo ane ne mi katekado kĩ kenye mi fɔtsa kpalewa a kame, lɔkɔa mibɔa mpae ne Hũhũ Kpalewa a kɔbẽ kame. <sup>XXI</sup> Mikɔla mi akũ ne Baguma ɔdo kame, ne lɔko a kĩ miadzɔle boe ɔlate Yesu Kristo kɔnyakamo a kĩ kɔayakpa mi nkpã kĩ elá kawũna a.

<sup>XXII</sup> Mimó be kame bikĩ betásipi ne katekado kame a konya. <sup>XXIII</sup> Bati bebã a kĩ banaa fi kame

a ni, miwãε be minyε, mite be nkpã. Mimó bati bebã konya lεmε mivila be, lokɔa mikesĩ be fɔkelatsa nde ayekĩ míawẽ sukena tetadie kpitii a.

*Kɔlekanye Mpaεbo.*

<sup>XXIV</sup> Baguma a kĩ yaapuli epi mi ayekĩ miláato, εkpã mi ne kawɔε kamε minaawo ye kukũkpale a anε, kĩ nfumususu adima leláa mi akũ. <sup>XXV</sup> Baguma odi keĩ kĩ etsã boe ɔlate Yesu Kristo akũ εkena ye boe ɔtεnε a, ade ye mɔ obu, kamu, kɔbẽ mɔ otumi nyε ye fude a, kito anε kɔkɔε, mɔ finyaa kanaa daa. Fɔya lomɔ.

**Baguma Apam Vɔɛ a Tuwuli**  
**Tuwuli: Baguma Apam Vɔɛ a Tuwuli New Testament**  
copyright © 2008 Wycliffe Bible Translators, Inc.

Language: (Tuwuli)

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 21 Feb 2024 from source  
files dated 29 Jan 2022

68df0193-2981-5275-8994-8f743fe01e5e